

春

融

堂

集

春融堂集卷六十四

青浦 王昶 德甫

傳一

顧在觀傳

以下十篇修青浦縣志作

顧在觀字觀生年十三補華亭縣學生及長博覽羣史於古
今治亂之原人才臧否之數能識其所以然陳繼儒見其史
選曰神明識略不可及也因推鳳皇山來儀堂以居之教諭
楊文驄命子師事焉馬士英總督鳳陽以文驄故辟置幕府
時論者抨擊不休士英患之在觀曰公素懷坦白無所附麗
今昵懷寧故衆情不免致疑阮大鍼聞大恚士英輔政在觀
首以起用老成分別邪正爲言一時若嘉興徐石麟會稽劉
宗周長洲徐汧華亭許譽卿夏允彝及陳子龍並登啟事而

大鉞憾東林諸人思誣以謀立他藩一網盡之最後嗾安遠
侯柳某上疏大鉞先詣士英屬以嚴旨票擬士英笑不應大
鉞怒曰東林間諜坐在汝家我固知無能爲也在觀嘗語士
英大鉞才智雄傑一朝得志爲所欲爲必不顧其後是事關
公門戶且係千萬世清議不宜強爲遷就士英子鑾亦以此
意極言之其時不致啟白馬清流之禍者在觀力也頃之左
良玉兵東下士英不知所出在觀曰亟卜蒲陽吳門二輔遣
使徵之以安江督之心卽屬兩公遺書諭以順逆西師猶可
止也大鉞沮之卒不見用在觀知事無可爲乃告歸山中有
瘠田二頃力耕疾織 給薪蒸之用後徵逋賦盡斥其產窮
死

陸振芬傳

陸振芬字令遠本姓林居辰山弱冠入幾社陳子龍夏允彝以爲不凡順治六年成進士會兩粵未平 廷議破格用人令隨大兵進討振芬奏對稱 旨特命爲惠潮巡道是年十二月 王師克南雄七年三月度大庾嶺抵韶州府巡撫李栖鳳傾心倚毗每事必諮焉時韶陽以南俱送款獨省城未下督兵攻破之遂同總兵郭虎等由省城至惠州府勦撫歸善海豐諸寨未至諸寨窺兵寡弱來拒夾師而進振芬選精銳數百繞出其旁獲一隊諸寨股栗于是諭以禍福投順者踵至至海豐薛進抗守不下振芬與鎮兵駐五坡驛總兵班某兵亦自羊蹄嶺合攻之兩日城遂下石碣衛等處相繼歸服八年抵潮州任兩月內聯給諸鎮檢制土官招集流亡簡省徭役民始有更生之樂時亂後法嚴府縣往往濫禁無辜

振芬定以逢五十日清理二年之內囹圄一空九年平遠失
守振芬會師復之總兵郝尚久于廣東未附時投誠素懷不
軌是年冬聞撤以爲水師副總兵遂連海寇結土賊僭制營
建帥府振芬察其逆謀屢牒平南靖南二藩及巡撫早圖弭
變弗應十年春尚久遂自署爲新泰侯圍道署振芬以大義
諭之不從乃密遣家人告急請兵七月都統率兵至潮振芬
約爲內應九月十四日晚掖外兵而上出其不意尚久授首
事平引疾歸里優游四十年始卒先是廣東惠來張庚振芬
署學政時試童子所識拔者也康熙二十七年秋庚以舉人
來令青浦首謁振芬振芬告以地方利弊語不及私子三長
相彬字孝質天性惇摯收養從子族孫之孤苦及族嫂之孀
獨無依者葬其疎屬十一喪康熙四十八年水災貸金糶米

五百餘石轉貸之藉舉火者數百家好行其善不恤勞瘁卒年七十有七

沈荃傳

沈荃字貞蕤居沈巷幼孤事母至孝順治九年進士第二人及第授國史院編修出爲河南分巡大梁道按察司副使時羣盜董天祿牛光天聚衆千餘剽掠許潁閒民皆驚竄荃至明卒伍懸購賞飭軍令遣中軍王福爲前鋒而身督勁兵繼之殲其渠餘賊解散禹州城四十里外有竹園叢篁密篠陰翳數里盜窟其中劫商賈殺而埋之荃遣吏卒收捕發土得屍纍纍盜具伏悉按誅之久之以監司入覲疏陳彰德養馬病民又禹州糧應分上下等皆中利弊報可康熙元年冬丁母憂服除補通薊道以他事望誤部議謫寧波府同知

未赴任 召見特旨復正四品仍入翰林其年冬補翰林院
侍講十一年典試兩浙未還轉侍讀十二年充 日講官起
居注十三年擢國子監祭酒十五年進詹事府右少詹事尋
轉左少詹事明年春晉詹事十九年加禮部侍郎爲詹事時
疏言 青宮在於豫養引明臣馬文升言并霍韜聖功十三
圖進之未幾復疏列出閣四事奏上皆報聞故事詹事得與
會議荃於民生利弊時政人才得失剴切詳言略無瞻徇十
八年旱 詔求直言時定新例當流者徙烏喇極北以實邊
廷臣集議荃謂烏喇距蒙古三四千里地不毛極寒人畜凍
輒死罪不至死者不應驅之死地獨爲一議上之 詔令畫
一公堅持前議曰此議行三日不雨臣願受欺罔罪
上改容納之越二日大雨盈尺例竟罷先是荃在大梁巡撫

賈漢復屬修河南通志既成上之後十餘年 詔天下郡縣
修志一以河南爲法康熙二十三年七月卒于位年六十有
一諡文恪以書名海內三十餘年被

聖祖仁皇帝特達之遇日或一再 召見

上或自作大書令題其後 殿庭屏障皆屬荃書之著有充
齋集子宗敬康熙二十八年進士由翰林院庶吉士累官太
常寺少卿亦以工書畫名于時

周洽傳

周洽字載熙居郊店六歲母亡能執禮盡哀每出聞鄰嫗呼
兒聲輒悲泣嫗怪問之曰痛我無母呼也年十六七貧甚欲
執一藝爲菽水資遂學畫於趙伊不數月盡其技遊揚州縱
觀前人名蹟而泰輿季氏所藏尤富洽日夜臨摹學益進遠

近諸公貴人爭延致之皆知洽有才不敢日以藝士在福州都統胡啓元幕下最久總督姚啓聖調諸道兵征臺灣駐城外一日忽移城中城中人皆惡而啓元亦未測總督意疑有變急召部下兵使與連營相次以備非常洽聞之入見啓元曰公此舉得毋以總督召兵入城故冀以制之乎啓元曰然洽曰公與總督身爲大臣轉相疑忌是非所以制之乃所以激之也某觀總督忠誠無他慮此舉不過欲耀武於衆耳公誠簡騎從往過微諷以地方當兵燹後靜鎮爲先一旦兵民雜處雖軍令嚴肅而小民無知必致惶擾恐乖公平日愛民之意如此則彼必喜公之推誠且理無以奪慮無不樂從啓元從洽言兩人驩好如初又在潮州知府梁文暄所方夜半總兵據縣詳文云甲首乙交通海寇宜急發兵掩捕文暄卽

卧内告洽洽曰此事虛實未可知今海宇寧謐人無異志恐是奸民陷害良善耳宜拘乙卽訊而緩其刑使不致妄承然後密訪甲素行若何并查與乙有無仇讎則事可立斷矣文暄如其言乃知甲售田于乙因加價構訟不勝而陷之者在河道總督靳輔幕時河工始告成輔欲繪黃運兩河圖呈覽以事屬洽洽曰歷年所進河圖多不稱 旨非親歷其山川城郭則位置不能無誤也乃徧歷兖豫雍冀四州之地閱四月相度河勢迂直緩急及堤閘要害之處手自摹寫而別爲看河紀程三卷繪以進呈

上覽之下旨褒美洽晚讀王守仁書覺生平所疑渙然冰釋不復留意于詩文筆墨然興至作畫人爭以價購之年七十有五卒有攤書閣詩文集藏于家

鄒允颺傳

鄒允颺字彥康以歲貢選寶應縣教諭在職九年康熙二十五年擢湖北當陽縣知縣當陽山谿深險前遭流寇殘殺

國初餘孽尚踞竹房諸處軍興旁午咸取給於民名曰差費外此公務派民協助者較諸正供至踰數十倍縣令因以居奇費一征十其間士大夫濫免刁民抗徵以至胥役土豪叢籍其中窮簷困於供億積四十餘年力益億允颺至痛革其弊縣屬稅銀三千二百兩有奇糟米八百餘石聽民以時投納額內無加耗額外無私征相沿陋例次第釐剔其奏銷公費及奉派雜項皆官自爲償初到任有紅船之役求免不得具陳所費上官謂可倚於民令集縉紳議之衆欲循例派民允颺曰他縣水次造船取辦猶易爲力今邑處萬山中寧

能陸地造乎吾邑向不派修此例一開是貽民無窮之累也
乃使人於漢口修造自出銀五百兩不取於民後亦不復派
也邑自兵燹之後戶口逃散田委榛莽允颺勸民耕墾聞風
歸者如市乃出示新闢地畝果成熟者報官准照下等田六
年後起科其舊墾未報者亦依自首律呈報不窮已往有賄
荒爲累者亦許開報核實緩其征田苦難熟半仰給於蠶麥
允颺春日開徵不差催不勾攝出片紙令牌甲按戶分給無
驚擾也鄰邑潛江饑上官委以履勘自持糗糒躬親履畝鄰
邑令具盤飧供帳悉却之瀕行者老醵金以獻允颺曰若等
方呼庚癸顧斂財爲壽乎鄰民猶吾民也吾寧有歧視也以
十分災報潛江人德之慎於刑獄未嘗妄杖雖盛怒應盡法
者必末減之尤善察隸卒用刑之弊曰隸得人賄用輕刑猶

可若挾風怨及受仇家錢毒刑害人上不爲之察受寃者何所伸乎已受刑者不加以他刑重罪荷枷與入獄者以時體察審其疾痛無寃死者嘗曰服官者初刑人必有傷懼之色久之而如擊土石如艾草芥矣人已一體其可以國法適喜怒耶惟窮惡大逆擒治如律不少貸以爲蠹賊不去嘉禾不長也犯竊者痛治之人病其過曰大盜起於小竊今小懲而大戒所謂以因圖爲福堂也賭博奸淫犯不輕貸以爲風化所關不特近盜近殺而已康熙二十八年夏夏保子以裁兵倡亂竊據武漢黃德四府勢猖獗距當陽城二百里邑多深谷叢薄而舊裁之兵閒處其中人懷觀望衆議繕樓櫓治鄉兵禁民出城及他徙甚有勸修山砦以爲縣官避兵地者允颺曰何事張皇以驚擾吾民也視事如常而密約邑中士

大夫之曉事者曰邑被汝家亦不可保若不爲國計寧不爲家計乎陰令合家僮暨村邑中勇悍少年遷入城內四門近處檢役隸中之幹而強者習武備授以庫械復召遠近裁兵論之曰吾觀若等力未衰今能爲我守護吾給若等費糧且爲言於上皆踴躍聽命人有固志會賊旋平乃撤備方賊之未平也或勸先遣家屬從閒道歸江南允颺曰家屬苟一出城人必以爲賊至遠近震恐人情瓦解非計也且賊苟得志則所在荆棘江南其可得至乎不如堅守或有完理設賊果來攻一旦力不能支則一門忠孝不猶愈死於道路乎聞者感動上元夕吏請循例諭里民張燈爲樂允颺曰張燈之弊遊蕩一也爭鬥二也火災三也充其類而盜賊奸邪每乘閒而起司土者在所宜禁可更張之耶自奉甚儉一袍常歷十

數年食無兼味居官七載家益落不知者多笑爲拙而允騷
方以自快也三十二年以卓異薦命以主事同知陞用既
去任民各繪像奉祀焉三十七年聞姊喪悲悼而卒

周綸傳

周綸字鷹垂茂源子隨父客京邸已有名董含董俞田茂遇
諸人俱重之康熙十八年歲貢廷試第五名授國子監學
正爲新城王士正所知生平以經世爲志嘗上巡撫湯斌請
官收官兌書云松江地丁漕白明朝有北運有收兌有經催
本朝定鼎一革白糧北運再革漕糶收兌均田均役復革
銀米經催小民按畝輸官卽各寧家鼓腹此眞生逢堯舜頓
離火溺獨漕白二糧不比銀錢輕易況起解條銀扛費水脚
不致官爲民代若旗丁由單石數內有正有耗而外船隻有

給行月有給五米十銀有給所患層累扣剋病軍卽以病運耳至官爲民收官爲民兌前此里排會議松江澤國米性潮濕民間倉棧積下旬日不加掘颺卽便溼爛故議掘颺風刮量加三升潮無乾縮量加三升恐納戶不能粒粒揀剔以稽開兌以誤淮限也貯米在厰潮水地面土氣上蒸務備蒲包墊草又加一升二合鼠糧三合至華婁兩縣除白糧官廳係屬公占而漕米倉房俱借之民其地基糧白理須給價完課故每石又加五合而修倉房買蘆蓆礮糠鎖鑰風車筥斗栲栳斗斛籌棒斛單串張油硃及倉夫執單紙張貼旗軍臨兌駁船發挑夫開兌脚價與凡僱募書算僱募斛手工食等項原議七分前此上下分斛斛淋尖高至四五指每石加八升之米變爲官加一私加一而七分之費大戢秤收起籌出

申項項勒索誠如今總漕請釐三害等事疏內收米一石止作七八斗脚價江浙反無額設民間私貼尚止銀三五分米三五斗乃湖北編有折銀三千九百餘兩每石復幫貼至一二錢江西已編脚價銀三萬四千五百餘兩每石復徵收水脚銀三錢五分及三錢二錢五錢不等均宜查革部議湖北江西既有額編脚價何得又行分外私徵贈貼等項傳述之頃歡聲雷震獨是我松幸賴廉明知府魯於康熙十五年下車以來恰值華亭知縣南婁縣知縣史兩賢令接踵蒞任革去種種陋弊俯准芻蕘荒區另編緩比秋成儘頂十銀爲數適足相當不至蒿萊日甚且詳明督撫官斛之上釘置斛攬形如卜字上下兩鑲復將七分之銀詳減二分八升之米詳減三升此時傳集里排黃髮皤皤交口稱頌咸謂米色畧可

通融使民易得上納則此三升之減猶懼不可經久以累官
長今華婁上青一概不收誠恐賠累在官一朝卸擔官何取
償變爲區收區兌則向來蘇州之官爲催比民自備版攢費
及至出兌之後纔給印串風雨火盜時刻憂虞陽奉官收官
兌之旨實則官催民收官兌松爲樂土相去霄壤爲此呈具
松江官收官兌原議并均編要畧均役成書三冊伏乞主裁
又爲松江士民陳明浮糧云恭讀 諭旨故明洪武因有仇
怨于民或一處錢糧徵收甚重我朝並無仇怨何可踵行爾
部詳察具奏旋聞江西瑞州袁州浮糧隨奉豁免則是江西
億萬年生靈皆 本朝特賜骨而肉之也茲蘇松待澤於
聖天子準諭減額惟繼因軍興旁午未敢比例上瀆今海宇
盡歸版籍康熙二十三年 大駕東巡賜蠲賜賑二十四年

直隸郡邑復免現年錢糧是 朝廷加意撫綏誠求保赤今以蘇松浮糧上告 宸聰必蒙矜閱因思兩浙田稅錢氏時畝至三斗宋室耆定遣王方贄均稅方贄以爲兩浙旣爲王民豈當復循僞國之法悉令畝出一斗若以松江論之宋時特華亭一縣耳屬浙之嘉興明祖取張士誠時田主佃入租額責成完賦較九升之科多至四倍雖守令考成纔及六七分較局然三百年來不能無致痛于洪武也况起科米石止二錢五分折徵而金花銀一兩一錢準科四石四斗三梭布一疋準科二石五斗名浮實約尚有壓欠纍纍五年之正供徒糜費于子年之杖比日復一日仍歸豁免公家本不得百姓之實額而曾不得百姓之感恩掛欠之久民脂民膏仍耗於胥吏之谿壑冊籍之遊移耳今不敢全望減額第願贖陳

蘇松情形聞於

聖天子將松江 斗六升五合等起科平米比照本郡之四錢五錢一石折徵田畝加三斗六升五合除本色米外應折若干概引四錢或五錢一石折算卽是故明初定之額而一轉移間邀 恩已渥至故明初定二錢五分一石之價不敢覲覲也若萬歷以後就事加編量行酌免按萬歷年間松江徵糧田四萬三千七百二十頃九畝零本色米四十六萬二千三十六石零折色銀四十三萬七千七百三十九兩零康熙二十三年會計除去墾荒松江徵糧田四萬七百四十四頃三十五畝零本色米四十四萬二千二百四十四石零折色銀六十七萬二千一百七兩零伏乞一一剴切聲明則東南民力起死回生也言雖未盡行時論賢之綸著述繇富有芝

石堂文稿不礙雲山樓稿八峯詩稿石樓臆編諸書行于世

王原傳

王原初名深字仲深一字令詒居啓聖里父九徵明季歲貢生以學行爲陳子龍所知原生八九歲能辨四聲十二三竊爲詩古文父得之喜其不凡年二十四爲縣學生康熙二十七年成進士未及用從刑部尚書徐乾學修一統志於包山三十三年選廣東茂名縣廣東徵糧舊責之里長而里長私派於民糧一石派至二三十兩民多棄田而逃原令里書編造業戶實名而里長之弊以革其業戶棄田而逃者遺糧派諸鄰戶逃者歸則并數年之所攤而責之故逃者卒不敢復原代爲捐辦遺糧不得攤派鄰戶而逃戶之歸者日多南橋有人市父鬻其子夫鬻其妻嚴爲之禁人市始除其餘設義

學禁巫覡鋤強梁雪冤滯頒婚葬之式頌聲大作移署信化
三十五年以解犯脫逃解任未幾弋獲復官三十八年補貴
州銅仁縣縣舊爲苗窟荒僻殊甚原建學以訓子弟教治葛
以爲布焙茶榨油以爲用溪水湍急教之造舟以興販又設
保正保副訓練鄉勇以禦苗患設苗寨長貳以約束羣苗銅
仁大治四十一年行取試授工科給事中時平陽府知府馬
思贊請以天下錢糧加一火耗作爲正供

聖祖問州縣之爲科道者原奏言其不可

上是之議遂革尋以劾文選司郎中陳汝弼姦貪牽連降級
以歸按王勳並王式丹行狀丙午榜發中式第六名時上考
陳公某得卷歎賞已置第一矣會同考有爭元者故置
第六公選拔同年二人同第一人皆以縣令行取例科道兼
補而三人者欲補科選司陳公持之意未決陳公者公鄉試
座師也三人以公同年同第相好託爲之言又於給諫湯公
西崖坐上作書致之西崖湯公亦某某同年也科臣某既入

垣卽疏劾陳公以重罪陳公性剛少台選事或行已意延臣
多疾之事下法司擬大辟
聖祖自南巡歸廉知其事得召見具言科臣挾私陷害以
公手書爲證遂命內大臣覆審公具言手書始末詔與陳
公合於是陳公得免罪三人者皆革職湯原壯而力學老而
公與同席并奪俸六月公亦僅奪俸一年
不倦早年受業於平湖陸隴其已從睢陽湯斌問學精研理
道一以濂洛爲宗年至八十四卒生平著作繁富詩有短檠
北鄉閩海寒竿過嶺潘州惠陽岫雲銅江鸞臺滄江都蔗南
臆諸集經學有學庸正譌論孟釋義春秋咫聞史志有歷代
宗廟圖考明食貨志譜錄有深廬劄記深廬集訓終制雜說
雞柘集自著年譜古文若干卷

張德純傳

張德純字能一先居崑山依外家黃氏遷于青浦年二十七
舉于鄉康熙庚辰成進士初授內閣中書舍人戊子改授浙

江常山縣知縣常山居水陸衝土瘠民悍號爲難治又爲錢
唐江發源處雨稍後時則憂旱霖潦集則苦水甲午秋菑特
甚德純蠲賑之外復請發省倉米數千石分置城鄉平糶且
許極貧者借貸衣食至秋熟還倉丙申復被重災請米糶借
如前民賴以存活者甚衆邑賦二萬餘地丁分納丁賦缺則
攤之貧戶德純于編審時力清其弊請均丁于地而民困以
蘇江右閩中之氓春來佃麻縛棚爲居秋則棄去向患滋事
編立保甲每棚設長以稽之自是人無犯者官九載以失察
旂人解任少丁詩有松南詩鈔晚年一意窮經儀禮周禮皆
有箋釋詩經解頤孔門易緒離騷節解尤殫數年精力而成
卒年六十九子之頊字堅孟以歲貢教習選貴州印江縣知

周士彬傳

周士彬字介文由縣改入府學生幼事繼母能孝母束縵操
作士彬織簾於其旁輒記誦四書諸經及長益研究宋儒語
錄以身體之期於實踐時施維翰爲山東巡撫招致幕下適
奉裁東省提督標下兵兵變方五月五日燕客倉卒無以應
士彬請發庫帑數千金以安軍心且奏請給裁兵半餉俟訓
練簡汰老弱卽拔驍勇者以充之其不堪者勒令歸農如是
則反側自靖維翰從之事乃定明年維翰晉浙閩總督士彬
以親老辭歸先世家千山所居堂曰山舟關山舟之西偏曰
寶善堂偕其妻承歡養志及居喪哀痛成疾諸醫束手士彬
曰莊敬可以日強遂半日靜坐半日讀書由是道益修病亦
平復服闋中康熙三十五年鄉試副榜生平視天下無可忽

之人亦無可忽之境居常昧爽而起度時可執作始召家衆
早起七十後冬寒風興如故或止之曰旣寤復寢是自甘昏
昧放逸也平日泊然無所嗜好大要以靜敬爲功卒年七十
八著有增訂韻瑞八十卷文集二卷山舟學詩草十二卷

胡寶琮傳

胡寶琮初名金蘭字泰舒祖希烈以貢生歷官常州府教授
始自歛遷于婁縣寶琮生有神兆資稟異人雍正元年舉于
鄉乾隆二年試授內閣中書大學士鄂爾泰選直軍機處六
年秋大學士查郎阿兵部侍郎阿里衮奉命相度奉天三
省地形請以同行時適隨駕校獵卽由木蘭遍歷諸部至
盛京過吉林渡松花江轉至黑龍江再轉至寧古塔又遍
閱諸邊及春而還共行二萬二千餘里橫穿側出于冰霜風

雪中覽

形勝辨其土宜自以爲極域外之大觀也會舉御

史查郎阿疏名以上

御試第一時已遷內閣侍讀旋授福

建道監察御史轉戶科給事中再遷順天府府丞寶琿任道
科五載屢上疏言直隸賑濟請酌量土著流民分別處置河

南查閱營伍當杜苛派剋扣之弊山東江南被水州縣宜乘

水涸時設法疏導皆得

旨允行十三年

王師剿金川

命大學士傅恒爲經畧

敕以從行日馳三百餘里恪遵

廟算剋期告捷寶琿贊畫居多擢順天府府尹前後

賜賚

甚厚屢遷宗人府府丞副都御史十六年隨

駕南巡有偃

師奸民傳毓俊以私憾控張天重謀逆逮係百餘人

命寶

琿往鞫乘傳七日而至集案贖視之比夜分曰吾已得其實

矣一訊而伏止誅毓俊一人餘皆省釋中州人以爲神明明

年遷兵部右侍郎兼府尹如故遂授山西巡撫旋調湖南自
湖南而江西而河南再撫江西復至河南凡四省六任焉在
山西撫饑民理冤獄抉貪吏除奸豪整關隘力行教養之政
在湖南民貧俗傲苗獠困兵役之擾悉整飭之其在江西設
編船嚴保甲以息鄱陽之盜奏罷廣信開山之議重封禁山
以杜後患江淞歲饑江西亦中熟因市僧居竒迺宣禁以
通商販鄰省賴焉及二十二年撫河南方患水開陳汝許與
河北之彰衛懷同時被澇者六十餘州縣

天子軫念災黎發帑金數百萬撥米數百萬石以賑之寶琮
率屬吏計口而賑不遺一人葺廬舍招流亡借牛種至冬隨
地留養所全活以數千萬計復奉 命開濟水道工賑兼舉
民飽食趨事所開幹支各河凡六十有七道計二千五百餘

里皆因自然之勢層注而下分入于江南之濉泗諸水滙于淮以歸洪澤湖迺會其源流記其深廣爲圖說以獻請御製碑文以垂永久

上深嘉之加太子少傅自是連歲大稔二十五年十二月復移江西次年七月河決楊橋沁洛丹衛同時並漲被水者五十餘州縣命大學士劉統勳協辦大學士戶部尚書兆惠及戶部侍郎裘日脩南河總督高斌共治之復召寶琮撫河南時決口數百丈未合將開引河築壩束水需糞薪之屬數千百萬日役數萬人以次徵發受傭者皆與直民不知擾被災之地闕卹周至無一流亡者水落田出民借種以播菽麥次年秋皆復大熟寶琮在河南最久習知其地利民俗盡心經畫故民樂而安之二十八年正月卒於官事聞贈太

子太保兵部尚書謚恪靖 賜祭葬如例且 允所請入籍
青浦寶瓌兄弟八人長嘉會次嘉浩皆庠生三才標監生四
寶璫國子監學正五嘉謨六寶光舉人鳳臺教諭八寶琳由
保舉至刑部郎中累官山東鹽道家門鼎盛不改儒素嘗被
命祭告請假便道還松江太守聞之曰吾官此數年矣不
知郡中有此縉紳訪之則已徒步至里門所居破屋數椽門
不能容車猶然蓬蓽也歎息而去

宋德宜傳

以下十二篇修
太倉州志作

宋德宜字右之崇明人遷居長洲順治十二年進士選庶吉
士授編修歷官吏部尚書文華殿大學士加太子太傅以疾
卒于官年六十二謚文恪予祭葬德宜風度端凝學問淵裕
爲都御史上疏請弛海禁更定鹽法裁省筆帖式禁黃硝又

言捐納授官非經久制請限以月或以年所言次第舉行又言各處統兵大將軍王以下玩寇殃民或掠取婦女或擄奪財物請嚴飭禁絕

上是之山東大帥柯永綦縱兵鼓譟德宜疏劾卽命逮訊大軍進黔秦蜀之餉彼此推諉會星變德宜言併川陝總督爲一人則痛癢相關可以隨地調發從之削平滇黔粵蜀俘獲婦女籍旗下德宜言婦女何辜宜聽收贖所釋甚衆德宜口訥至國家大事自爲一議反覆開導多所報可性孝友年十七以父學朱巡按山東死事狀伏闕上書得贈卹兄德宸字御之弟德宏字疇三早著文譽一時有三宋之目長子駿業累官兵部右侍郎次子大業內閣學士康熙三十二年典江西鄉試取朱軾第一

陸元輔傳

陸元輔字翼玉嘉定人先世王姓居北城父昌期以掾起家署大平府司獄申明冤濫調番禺沙灣巡檢初至獲渠盜上官輒以賄縱昌期乃以藁縛投海中盜少息番禺人祀之名宦元輔爲黃淳耀門人在直言社中小有指摘必痛悔流涕淳耀稱其學行後棄諸生博覽載籍益研精於經術康熙十七年舉博學鴻詞抵京夢見淳耀與語入試不終卷而罷館京師文學侍從之臣每承 顧問有僻事未能對者輒訪之元輔口荅手疏莫不曉暢而去購宋元明人經說至數十種泝其淵源剖其得失輒爲題跋朱彝尊經義考多取其言爲摭子宗濓字維水太學生復姓王詩文一軌於法有固窮之操卒年八十

吳偉業傳

吳偉業字駿公太倉人先世皆以科第文行著聞母妊時夢
朱衣人送鄧以讚會元額至遂生偉業幼有異質篤好史漢
張溥見而奇之遂爲弟子崇禎四年會試第一懷宗批其卷
曰正大博雅足式詭靡殿試第二授翰林編修給假歸娶時
有姦民首告復社事當軸陰主之欲盡傾東南名士偉業疏
論無少避九年充湖廣鄉試主考官陞南京國子監司業會
黃道周論楊嗣昌奪情廷杖偉業具橐籥遣太學生涂仲吉
入都訟寃旨嚴詰主使幾不免十三年晉中允諭德八年轉
庶子未幾擢少詹事甫兩月謝歸 國初總督馬國柱疏薦
授秘書院侍講奉 勅纂修孝經演義陞祭酒丁嗣母憂
聖祖親賜丸藥撫慰甚至旋以江南奏銷議處適遂初志焉

所居梅村名曰鹿樵精舍本王士騏賁園花木翳然因取以
自號居十餘年卒年六十三初偉業及第年甚少才名爛然
海內爭慕其風采及爲諭德侍太子及定王讀書甲申之變
太子爲李自成挾去不知所終故有詩云我是淮王舊雞犬
不隨仙去落人間又遺命題墓前石曰詩人吳偉業之墓其
寄托如此長洲尤侗贈以詞云江山如夢眼前誰是舊京人
物又云椽燭衣香少年情事頭白今成雪偉業讀之泣下爲
文瑰偉宏富詩尤擅勝取明季遺事用王楊元白體詠之蒼
涼悽麗曲折詳盡咸有黍離麥秀之感稱爲絕調晚年著春
秋氏族地理二志支分派別証以史記漢書及後碑記之文
意不欲以詩人終也兩書皆未刻藏於家子暲康熙戊辰年
進士官至給事中亦工詩孫遵彥由舉人歷任福建四川知

縣有能吏名

王揆傳

王揆字藻如太倉人錫爵曾孫父時敏夢高僧聞谷而生康熙九年進士改庶吉士授編修丁內外艱服除由左贊善補右充 日講起居注官提學浙江校劉宗周全集刊之表章啓禎忠節立六賢講院修三江口黃尊素祠使教諭以時致祭期滿歷講讀學士累陞內閣學士轉戶部侍郎充 經筵講官三十七年調吏部右侍郎轉左時吏道靡雜姦胥得上下其手揆悉心條列定爲章程銓政一清 命督河工省帑金六十六萬四十二年陞刑部尚書尋調工部轉兵部禮部在刑部時往例錄囚止錄清書口供漢司官不能通曉揆請兼錄漢稿著爲令又論刁猾以細事控部之害他如疏爭香

山知縣張令憲死事之宜蔭紉御史陳惟孜散遣太學諸生之非體抑功加之冒濫禁考工之愜規皆總持綱紀務存大體及爲大學士益恪謹凡章奏閉閣獨繕五十六年冬會有御史八人以建儲請

上下其疏并出揆五月間摺外廷始知揆有是請翌日閣臣擬票具奏 上諭王揆所奏具見惻誠亦言所當言爾等票擬殊不合揆等所奏著留閣中時揆以摺本故不敢同諸閣臣入奏事

上召揆入將出獨留揆移時乃出人莫聞其語六十年春復具疏力申前請同時請者又有御史十二人

上疑出揆意乃下 嚴旨切責令揆回奏奏上越五日 命揆子奕清代往軍營効力時揆未解閣務以待罪不視事明

年春仍命入閣任遇如故

世宗卽位揆以衰病請告 溫旨留京備顧問越六年卒年八十四雍正十三年奕清還京爲父請卹奉 旨予祭葬揆好汲引善類不植私人屢主鄉會試事均稱得士立朝從容風議不爲崖異及臨大事風節凜然

孝惠皇太后之升祔揆關衆議請躋於

孝康皇太后之上其合禮稱 旨多類此卒後十餘年其孫懷始克舉葬子奕清奕鴻奕清字幼芬揆娶長洲宋文恪公女婚夕夢有緋箋署其卧闕曰詹事府掌詹事旣而生奕清康熙三十年成進士改庶吉士歷官詹事府詹事奕清生長名闕文采著聞典試視學外凡 朝廷編修校讐之役多以畀之其代揆赴于軍也腰弓躍馬北出萬里抵大營屯分駐

地曰忒斯曰阿達拖羅海窮荒大漠風景寒慘奕清素羸營
病處之六年冥然安之雍正四年再命在阿爾泰坐臺又
十年乾隆元年始召還都仍以詹事管少詹事明年春陳
父建言始末請卹典得旨俞允且給假營葬不及就道而
卒年七十三其終于詹事竟與夢符奕鴻字樹先康熙四十
八年進士授戶部主事歷陞員外郎中五十三年典四川鄉
試出爲湖南驛鹽糧儲道六十年奕清代父往北路軍營奕
鴻盡斥其產請送軍前奉旨與奕清俱請烏里雅素臺劾
力臺在蒙古外喀爾喀地與俄羅斯壤接蓋盟長超勇親王
建牙之所坐臺十載乾隆元年命還朝發四川以道用初
謁松茂道適小金川土司相仇殺奕鴻曉以禍福各帖服尋
補川東巡道引疾歸又十五年卒於家年八十有二

春融堂集卷六十五

青浦 王 昶 德甫

傳二 小傳

王原祁傳 附王

王原祁字茂京太倉人時敏孫揆子原祁工詩文尤精畫法
 臻神品康熙九年成進士觀政吏部二十年充順天鄉試同
 考官稱得士除任縣令任故古大陸為九河下流時大濬部
 使者按視至任一望巨浸原祁據縣志力爭賦得弛又請於
 臺使奏減歲賦三千餘兩在任四年尚書魏象樞巡察畿南
 凡大案必委鞠焉每行取擢刑科給事中轉禮科三十九年
 特旨改中允入侍 南書房歷侍講侍讀學士充 日講
 官累陞詹事府詹事掌院學士原祁以文章翰墨結

主知常召入便殿從容察對或于御前染翰五十一年陞

戶部左侍郎會豫省災折徵漕米原祁力請分年買補又

上諭直省錢糧三年輪蠲一周舊欠竝與豁除江南以秦銷
稍後不入蠲數原祁獨請如詔旨不以桑梓引嫌聞者趨
之五十四年年七十以疾卒於位特賜全葬予祭原祁體
貌瓌偉虬須豐頤遇物坦易

上嘗稱其存心莫及沒後丹青流布寸縑尺素寶若拱璧自
是江浙之工山水者皆本原祁而子孫以畫知名者亦衆子
墓

暮字孝徵康熙四十五年進士改清書庶吉士己丑授館職
癸巳奉旨養心殿行走甲午充河南鄉試主考官乙未丁
外艱戊戌服闋補原官庚子冬提督陝西學政科試擢游得

宜第一謂衆曰斯文也秋試亦當首選榜發游果得解在陝
六年甲辰陞洗馬丁未回京充會試同考官又充日講起居
注官升右庶子旋擢侍講學士七月陞少詹事九月命往
廣東署布政使己酉春調直隸布政使時州縣新舊交代惟
倉穀爲難或前官預儲醜穀或後官延宕不收互詳聚訟糶
稔其弊使碾米交代以一米抵兩穀糶之平糶後以價貯庫
秋成時新任買補有司便焉兵餉舊例于次月初始領前月
糧糶令于前月望後發次月之糧營弁頌爲善政乙卯夏調
任山西布政使丁巳入覲擢任廣東巡撫時瓊州一郡編征
稅銀多缺額地方拘于考成在地丁榔柯稅排門烟戶等項
均攤賠派糶澈底查清奏免四千餘兩以蘇民困廣東濱海
颶風起潮溢爲災糶委賢員協辦軫恤無使失所瓊州懸海

外水土瘴毒蒞茲土者偶有死亡道路遠家口不能歸骸骨
旅殯墓請酌動存公銀兩給發路費洋船向有閱貨之例俗
尚奢靡犀珠磊落玩好炫目蓄素無嗜好各商望風却走南
海神廟載在祀典向惟有司官代往誓必親往祀之省城粵
秀書院諸生使通經學古適于寔用庚申冬有忌而劾之者
奉 旨回京至壬戌冬落職命赴軍臺效力冰雪載道力疾
而行至第五臺奉 恩旨召還癸亥歸里十餘年辛未 南
巡 奉旨加三品職銜又三歲卒子述濬字雋驥雍正四年
舉人和州州同有惠政會歲饑奉檄查賑勞勤致疾卒於賑
所孫鳳儀

顧陳埈傳

顧陳埈字玉停太倉人少有文名康熙五十四年舉人以薦

入湛凝齋修書書成議敘授行人司行人出使山東浙江所至得大體還督通州倉雍正三年以目疾乞歸陳埒有絕學三字學算學樂律俱極精詣尤敦于內行居喪不飲酒食肉不處內學宗陸九淵自命爲象山後人性侃直纂修時總裁以文屬點定一日盡駁其稿總裁怒擲地陳埒徐起拾之明日總裁悟卒從其說監倉洗手從事官吏經紀不得恣侵牟里居非公不至官府留心著述教授生徒質疑問難者滿座乾隆元年詔起官以親老不出又時舉博學宏詞詹事王奕清薦之巡撫顧琮亦將論薦而時議當俟巡撫偕總督學政考試遂辭不赴時論高之年七十卒

趙俞傳

趙俞字文饒嘉定人康熙二十七年進士崑山徐乾學座主

也得其文驚歎以歸有光自之未幾邑有大獄詞連俞遂以
褫職同年知其寃出醵贖之因復進士謁選得山東定陶縣
泄任見淫潦滿野集父老問之曰邑所苦在此俞度其境縱
橫爲三渠以通大川如古溝洫吟塗之制蓄泄兼資而車輿
可通規畫定令民自浚其界旁之渠旁近者協理焉恐塗之
易圯也築令平實樹以桑棗雜以榆柳俾落寔取材交有所
資又以三渠不能偏通四境且車馬蹂躪或陷于淖或橫鶩
別驅爲害黍豆明年擇其要處又規爲六路其廣倍三渠之
堤而傍路有溝殺于渠者三之二俾宛轉以達于渠其築樹
之法一如渠堤然後雨潦之集悉達于河連歲大熟周城壕
令民栽蓮以取利立法輸糧不施鞭扑吏役無事公庭寂然
平時課士最勤親爲講解指畫餘閒或挈之以遊士莫不鼓

舞共勸于學修學宮從祀位次考之闕里誌自爲文以記之
任五載辭疾歸發舊所藏書讀之司馬光通鑑杜甫詩韓愈
文及歐蘇諸集皆手自批注結淡成社與同志從容觴咏卒
年七十有八孫丕烈亦以文學稱

沈起元傳

沈起元字子大太倉州人父受宏能詩有白澗集傳世起元
年十二能詩古文康熙六十年進士改庶吉士乞養歸旋丁
艱服闋入京值澄汰部屬選庶吉士補之遂授吏部驗封司
主事由員外郎出爲福建知府初試福州隨授興化署臺灣
所至除積弊革陋規捕宿盜懲訟師以閩人言語不正立正
音書院在閩三載政聲日著俄以平反忤按察使被劾鐫級
乾隆元年起授江西鹽驛道旋擢河南按察使晉直隸布政

使內遷光祿寺卿十三年因公降級明年乞假歸起元性端
慤廉潔自好刻意爲民遇事一本至誠而才識足以行之莆
田縣有陳王二姓訐訟累年樹黨互毆巡撫按察使將各置
重典起元廉其實獨坐首事者尙書史貽直奉 旨至閩甄
別府縣以起元爲第一臺灣猪毛社生番擾境衆議立界起
元謂彼非奪地特如猛獸出山則噬人耳界何益請於山口
設寨禁其入境遂寧河南兩潦四十六縣災起元議於本
省不成災處招集授糧民以得生開封歸德旱蝗禱于社神
蝗盡死八年直隸旱總督議以十一月開賑起元力爭得速
賑所屬有稟賑戶不賑口者嚴斥之災民俱得實惠又絕鹽
綱之例餽却庫封之羨餘省州縣解項之苛駁寬盜案三月
之率結聲名益振自少羣心理學謂學問須知行合一以躬

行實踐爲驗時張伯行主朱子而斥陸王李紱主陸王而詆朱子起元不肯稍有附會謂孔門弟子自顏曾外入門各異歸於聞道今宜恪守經書實實爲人不必高言作聖晚年窮易理撰周易孔義以十翼爲宗歷主鍾山溧源安定婁東四書院藉以自給寡如也病亟謂醫曰吾自念平生學力惟檢點身心使明淨純潔以還天地父母耳言訖而逝年七十九著有敬亭文稿

張鵬翀傳

張鵬翀字天飛嘉定人雍正五年進士授庶吉士改檢討充皇清文穎館纂修十三年充雲南副主考乾隆元年冬充八旗志書館纂修六年陞翰林院侍講七月充河南正主考九月陞右庶子十月充日講起居注官七年擢少詹事九

年晉詹事鵬翀宿慧詩才敏捷文手擊鉢頃刻卽成每有
敕和先成以進者必鵬翀故

上愛其才不次拔擢侍講日進經史法戒詩五十章寓規於
頌

上嘉納焉又陳十慎箴稱 旨兼工於畫嘗自繪春林澹隱
圖題絕句六首進呈

上和其韻以賜鵬翀卽於宮門前疊韻謝 恩嗣後屢 敕
和詩屢 命作畫 賜御詩書畫暨筆硯紗緞絨貂之類無
算每 召見溫語移時諮訊纖悉十年乞假省墓抵德州病
卒

上久而不忘對羣臣輒曰張鵬翀可惜云性好山水所至必
以五七字寫之故詩編最富有南華山房集三十卷

秦倬傳

秦倬字天采寶山人乾隆十三年進士遷雲南江川知縣留心民事抵任後陳于上司云查江邑賦役全書載民屯田地五百二十九頃七十一畝每年額收條丁差發漁課溝課鈔銀一千八百三兩秋米一千五百七十六石九斗地土出產南豆大小麥苦甜蕎水稻穀目下雨水充盈田禾暢茂某督其勤于芸耨以期秋成豐稔常平倉存穀八千四百九十四石零奉某文出借乏食農民穀二千五百四十七石已于五月二十九日開倉均勻借給民食有資而各社倉存穀三千五百六十石五斗前署令已於春仲具報出借二千二十二石七斗以濟籽種現存一千五百三十九石八斗加謹收貯無虧惟水利民生最關緊要縣轄如海西鄉地勢低窪卽西

山鄉亦時慮河堤衝決應令農民隨時疎導修堵近城田畝
惟賴東西二河緣河高田低易於沖壓前經設立壩頭巡查
擬於農隙時督夫修堤又舊有官溝一道引水入城灌西北
一帶田畝亦擬修濬再查海門橋爲星雲河洩水要口一有
淤塞則縣屬古城海西雙龍等鄉並寧州虛于鄉每多水患
亦應督夫疏修以興水利至于士習民風向稱刁而好訟某
到任後據法懲創詞狀漸少勉爲良善他如弭盜賊戒游惰
靖地方而安民生尤某分內之事政不阻勉供職保甲議云
江川一邑在晉寧昆湯河湯新興寧州通海河西之間係近
省腹裡地方無深山大箐亦無銅鉛等廠幅員褊小分爲十
鄉每鄉各設鄉約一人其保正視村落遠近人戶疎密爲差
多寡不等如榮富甸頭牛摩西山海西古城上下雙龍普妙

等九鄉皆漢人所居惟九寨一鄉盡屬獮夷無土司管轄被
化既久夷風漸變保正之法在在可行是以諭令鄉保將各
村人戶男婦丁口作何生業并同居親屬僱工姓名按照門
冊詳細開報每戶給門牌一面卽卽照開報人數填載十戶編
爲一甲另給一牌其甲長按月輪當平時則稽查出入失事
則分別懲勸甲內之孤寡廢疾一體編查免充甲長畸零人
戶附於甲末該鄉所設約保悉仍其舊按年更替諭令各統
所管不時稽查勿許通同容隱戶口如有增減於歲底報明
換給門牌不必拘定十甲聯爲十保之例仍於因公下鄉之
便留心訪察務期奸匪難容地方寧謐門牌所需紙張在官
捐辦以省擾累至於九寨一鄉每村大者數十戶小者十餘
戶各有火頭一人催糧辦公按年自行輪替其每戶各給門

牌與各鄉相同每村只須給一總牌卽以稽查約束責之該
村火頭并該鄉約保正毋庸另編甲長更爲簡便又申飭士
子云江川僻處遐方書多未見十三經二十二史有至老不
識其名目者於此而欲求奇才異能之士勢必不能士倘潛
心攻苦日取經史讀之自可開拓心胸讀書之法經爲主史
副之十三經闕一卽如手足之不備而不可以成人者也至
於史則先史記次前後漢書此三史者亦闕一不可且善讀
史者不僅以史視史凡詔誥奏疏檄論策之屬文之祖也
樂章歌辭之屬詩歌之祖也屈原賈誼司馬相如揚雄等傳
所載騷賦詞賦之祖也故熟於三史則文詩騷賦一以貫之
矣必待讀經畢而後讀史則史學太遲須讀左傳以史記副
之讀公穀儀禮周官爾雅以前後漢書副之此外如國語國

策離騷文選老莊荀列管韓以及漢唐宋元之文集與三國志以下諸史擇其尤精粹者讀之然後反求其本出言爲經術行事爲經濟夫而後可以爲國家得人此縣令之兢兢爲諸生望者也其篤于教士如此知府李承鄴由蔭生部郎以貲出爲澁江知府行查倉庫因供億不豐衙之遂言其才力不足總督恒文劾罷之比去任同官贖銀爲助乃得歸歸六年而卒年七十餘俛嗜讀書自記平時所讀一萬三千一百九十三卷內記憶者八千餘卷著有三餘前後集一百三十卷惜無傳之者

王鳴盛傳

王鳴盛字鳳喈嘉定人明司業逢年之後少敏慧弱冠補諸生屢試第一巡撫招入蘇州紫陽書院院長歸安吳大受常

熟王峻先後賞其才爲文鎔經鑄史風發泉湧乾隆十二年
鄉試以五經中式會試不第歸蘇州時沈德潛以禮部侍郎
致仕海內英駿皆師之門下以鳴盛爲最又其時長洲吳泰
來上海趙文哲張熙純及鳴盛妹夫錢大昕皆以博學工詩
文稱而羣推鳴盛爲渠帥十九年以第二人及第授編修公
卿爭禮致之刑部侍郎秦蕙田方修五禮通考屬以分修而
尤見重于掌院學士蔣溥二十一年大考翰林鳴盛名第一
特擢侍讀學士三十四年考試差第二充福建鄉試正考官
尋陞內閣學士兼禮部侍郎事竣還京以濫用驛馬被吏議
左遷光祿寺卿尋丁內艱歸遂不復出久之遷居蘇州學者
望風麇至鳴盛又有江左十二子苔岑諸集之刻聲氣益廣
名望益深而鍵戶讀書絕不與當事酬接家本寒素往往賣

文諫墓以給用餘則一介不取也偃仰自得者垂三十年嘉慶二年十二月歿於蘇州鳴盛爲詩少宗漢魏盛唐排律則仿元白皮陸在都下見錢載將士銓輩喜宋詩往往效之後悔復操前說於明何景明李攀龍李夢陽王世貞陳子龍及國朝王士正朱彝尊之詩服膺無間大抵以才輔學以韻達情粹然正始之音也古文不專一家於明先嗜王慎中繼倣歸有光擷經義之精奧而以委折疏達出之詩文集凡四十卷先與元和惠棟吳江沈彤研經學一以漢人爲師鄭元許慎尤所墨守所著尚書後案軍賦考精深博洽比古今疑義而折衷之又著十七史商榷於一史中紀志表傳互相稽考因而得其異同又取稗史叢說以証其舛誤前人糾繆拾遺之作不屑沿襲撫摺也晚作蛾術編有說錄說字說地說

物說制說集說刻說通說系十門共一百卷亦以淵灝稱於世弟鳴韶字鶴谿少從兄鳴盛遊學日進兼工詩畫爲古文以清簡爲工兄奇其才責以制舉業鳴韶謂人曰兄固愛我不知我名心素淡也爲新陽縣學生時鳴盛已官翰林鳴韶獨晨昏侍父母閉戶研究典衣購書額其堂曰逸野旁闢一室縣蓑笠以見志嘗自作蓑笠軒圖少詹事錢大昕視學廣東邀與偕往途中遇名勝必往游有記程詩若干卷及歸遂於逸野堂授徒講業以終著文十卷春秋三傳攷十三經異義攷祖德述聞竹窗瑣碎共若干卷鳴盛次江左十二子詩以鳴韶居其一論者不以爲私

曹仁虎傳

曹仁虎字來殷嘉定人聰穎好學爲時文稟經据古娓娓千

言年十六爲縣學生學政崔紀有奇才之目巡撫雅爾哈善聞之遷入紫陽書院院長御史王峻尚書沈德潛先後稱其才而學政夢麟尤激賞不置雷鉉以優生薦舉乾隆二十二年南巡獻賦 召試列一等賜舉人授內閣中書時閱卷者爲大學士梁詩正更愛重之二十六年成進士授庶吉士散館改編修館閣代言之文院長輒委以起草典重清切宜古宜今擢右中允充 日講起居注官扈 蹕盤山奉 敕廣和尋遷侍講轉侍讀進右庶子擢侍講學士五十一年視學廣東與少詹事平恕接任恕諸生時嘗受業於門粵人傳爲佳話明年母程恭人終於官署時方按試連州聞訃冒階暑奔喪晝夜號泣竟以毀卒於途年五十七生平以文字受主知京察常列一等兩遇大考皆列二等教習庶吉士者七

典江西鄉試者一分校順天鄉試者一分校會試總裁武會
試者各一仁虎以聲華名望爲都下所推然端靜自守恂恂
粥粥從未至權貴熏灼之門其詩初宗四傑七言長篇風華
縟麗壯而浸淫於杜韓蘇陸下逮元好問高啓何景明及
本朝王士正朱彝尊諸人橫空排冪才力富有袞袞不能自
已七律尤高華工整獨出冠時時詩道雜而多端黃茅白葦
及仁虎詩出乃奏金石以破蟋蟀之鳴也存詠典齋委宛山
房春槃秦中雜稿碑影刻燭灸硯轅韶鳴春諸集

吳西林先生小傳

吳先生穎芳字西林居仁和之臨江鄉故自號臨江鄉人其
稱於釋氏則曰樹虛云先世居徽州休寧之黃源高祖繼泉
曾祖珍之祖君容父岐生先生少則端重沈默寡言笑年十

五而孤一赴童子試爲隸所訶曰是求榮而先辱也自是不復應試壹志於讀書嘗怪鄭氏樵通志務與先儒爲難于是取六書七音樂略一一從流而溯其源其用力則自樂始謂律管音調諸儒能致其說而不能習其器俗工能習其器而不能得其說遂以爲不可究詰案典籍證衆器成吹籥錄五十卷次及六書尊許氏之說謂今本說文取一字爲篆書而細書爲注其實許氏原文上下相連皆當作大書如鷓黃爲倉庚之名後人不知乃誤讀爲黃倉庚也又許氏所列文字闕有未備每於說中見之如某字从某則所从之字可以補正文成說文理董四十卷因六書而及音韻謂字讀有古音有正音經傳反切皆經先儒審定不可執後人口音以取証成音韻討論四卷又因說文而考制字之原分類六曰觀象

於天曰觀法於地曰近取諸身曰遠取諸物曰視鳥獸之文
曰與地之宜各溯其所從始而沿其孳生成文字源流六卷
又取鐘鼎文字有成篇可讀者釋其文箋其義詳論其前後
倒互之例讀之皆能文從字順成金石文釋六卷少與厲徵
君鶚交甚之學詩于是上溯漢魏下及唐宋諸大家熟讀詳
玩成一詩數改而後定編爲臨江鄉人集四卷古文尚平易
詩餘尚婉曲所作不多皆不存祖父以賞雄鄉里及先生簞
甚蔬食飲水忻如也村居閉戶不求人知與厲徵君往還桑
塍麥隴閒辨難不已過者聽之不知作何語也晚年名益著
通政使雷公鉉視學兩浙鳴騶訪之索太極講義而去武進
莊公存與典試浙江事竣肩輿出郭索其律管諸解卽吹幽
錄中之一二類也兼通釋典著唯識論文釋二卷又卽論中

條例指授學者謂之五要須知更有觀所緣緣論釋因明八
正理論後記因明正理門論各一卷東城餘庵僧蓮飲西城
慧安寺僧超塵各受其書而傳之撰昭慶律寺志十卷又同
寺僧輯律議法數三十二卷又次釋藏中精語名曰大藏摘
髓又爲辨利院撰志四卷院中有觀世音像五十三軸先生
蒐採數十年足一百八軸因作藏畫記一卷取爾雅博物志
本草諸書證其同異聚物之解毒者得百餘種造爲丸名曰
綠髓療創腫立愈惜其方不傳先生先娶於宋氏卒娶其從
妹二子長象乾次象鼎皆諸生孫二鍾嶽鍾崑曾孫三邦經
邦寧邦珍卒於乾隆四十六年辛丑二月二十七日距生於
康熙四十一年二月二日年八十所著書門人項埔及仁和
諸生朱文藻等校錄之以藏於家

論曰今與厲徵君交卽已聞先生名蓋工詩文博學隱君子也乾隆庚子徐至錢塘見王侍講文治爲言先生宗梵行研唯識論尤精是時厲徵君久沒錢塘諸老宿零落殆盡兼通內外典無如先生諸將偕侍講訪之以事未果辛丑秋復至錢塘則先生逝矣常恨聞名三十年不獲見以歿適項君具事狀來故摭之爲傳如此

周斯盛太守小傳

周君際清字斯盛系出濂溪文公之後先世由昆陵遷無錫父坦庵先生績學不遇子三人君長也乾隆甲戌與余同舉禮部從政刑曹君精研律例求古人忠厚至意數月卽能決疑獄而持其平前後十數年經君所勘無復有枉抑者己丑冬威寧州某揭部科奉命隨內閣學士富君察善往鞫續

命錢少司寇維城勘之案甫結復奉旨赴桐梓訊刁民聚衆而古州苗香要適爲逆隨少司寇勦之擒首逆寬脅從民苗皆帖伏未幾授雲南麗江府知府君以道遠不克迎養鬱鬱不自得臨別灑淚語其弟曰弟素能得老人歡幸善事吾年五十必歸養也遂行途聞所屬鶴慶州有變人情洶洶或謂旣未任事盍緩行以伺之君曰民愚鹵莽出此不速解且成大獄遂驅之民間新太守來相語曰是鞠獄梟梓明而有恩信者聚數百人訴於輿前君反覆慰諭令明日投詞衆稍稍散君故知爨由州吏廉得其要領卽夕械繫州吏數人於獄黎明民復聚集堂下索狀狀詞從人叢中出君怒曰爾等懼禍耶無主名吾何從判衆愕有聞乃進老者數人名君召之前諭以所控之非且述桐梓首難者所得禍衆感動呼

曰太守活我遂散去後數日擒爲首者子杖吏除名州牧亦以他事罷去之民大悅先是君入城守者衷甲入見曰將請兵制府君止之及是計所全活不下數千人撫軍以爲能留攝雲南府事數月境內稱治旋調楚雄以他事牽連掛吏議君欲歸諸大吏連章請留補知永昌府整躬勵俗威惠並施制府圖君思德案君所屬保山永平侵帑意并疑君已保山出入總簿內列收回本府門禮一條乃知君故廉欲以聞於朝君力辭曰吾思歸養久矣明年吾適五十也是歲丙申坦庵先生尙強健承伺意旨色笑爲歡擬終身不復出而山西巴中丞素聞君名奉禮幣請入幕君以親老辭坦庵先生命之行乃往後應明中丞聘亦如之癸卯冬坦庵先生卒哀毀不欲生又數年仲弟寢疾幾殆君躬調藥劑每夜問視輒

十數起兄弟子姪至今不析產孤孀不自存者挈而養之家世稱君者第謂處事明練操守嚴介故引疾歸田囊無長物不知其內行篤摯如此先是乾隆己亥余過無錫君偕顧君光旭邀游惠山宴於寄暢園卜夜甚驩及癸丑春余請假歸復訪君於里第訂以秋閒投轄罄平生懷孰意竟不可得也悲夫君以八月某日卒于家年六十有六子三玠瓊環咸以好學克家聞

贊曰余讀書君陳訓其寬而有制從容以和無倚法以削而先之以孝乎惟孝友于兄弟克施有政然則君以仁恕稱非令德孝恭之所推乎往秦文恭公長秋官駿厲明肅執法不撓君嘗佐以輕典蓋予所親見者然則至治馨香格於明神雖不克大用于時而子孫循謹獲佑於明神蓋未可量矣夫

潘君上舍小傳

潘君字玉符名榮錦先世湖州人高祖某遷于蘇州吳縣洞庭東山施巷父某寓青浦之珠街里君少端重執經詹事王世琛之門以父年高棄舉子業治生產舉所入庀甘旨日夕治具唯謹父病瘡不解帶者數月居喪哀禮兼至故人稱其孝昆弟三人弟出爲季父後析產例不得分君如數以子弟固讓君君不許交讓者久之卒均諸宗黨故人稱其友延名師訓子命諸子皆受業曰吾以家累故不得卒志于學今或于諸子得之以顯揚先人猶身受也康熙戊子丁丑閒青浦大祿君儲米給其鄉人織者給吉貝藉以活者無算貧而殤者俗以火化君買地一區置義塚瘞葬數千計遂無焚如弃如者又洞庭僻處太湖中節烈事多晦弗著倡議建祠丹青

炳然栗主森列連惓幽蹇以歿者盡得著聞于世蓋君子敦
忠厚尚行誼類如此配葉孺人事姑以孝聞聞有善輒典衣
鬻釵以助君君卒年四十有七孺人後君若干年卒子惟仁
惟恒惟信皆克其家初君之父資性伉直恒緩人之急往來
襄漢闕以節俠稱至君益甚蓋家訓使然然亦由君之克承
先志焉

贊曰予讀周官見先王之訓州黨鄒鄙者至矣大率以孝友
睦婣任卹爲先使人咸以是自勵則道德一風俗同又奚難
雖然非家法淳謹天性足以副之不至此方君之營義塚也
有司聞欲請于朝君因卻之乃止嗚呼此豈邀浮譽以自
夸詡者比哉

繆君笏巖上舍家傳

君繆姓名珽字秉廷一字笏巖其先由江陰遷于蘇州代有
聞人六世伯祖昌期以論德死闕難世稱六君子之一贈詹
事謚文貞高祖慧隆貢生曾祖彤康熙六年第一甲第一名
進士官至翰林院侍講祖曰藻康熙五十四年第一甲第二
名進士官洗馬父敦仁乾隆二年進士兄弟五人君其長也
少有至性母宋太夫人病目君朝夕舐之百日翳盡目明久
之復病勢劇醫藥無效君又割股和藥以進病亦等愈太夫
人姪女少喪父君取而撫養及長擇婿嫁之太夫人喜以爲
能承已志也次弟穉病衆謂非多用葠弗濟進士公難之君
乞嚙已產爲葠費遂賴以瘳又進士公卒次弟玠幼君延師
督課入學爲博士弟子已而早卒又撫其孤如已出也姻戚
有幼而無父者多收卹之君以祖父雖祀鄉賢而家無宗祠

學士公所置祭田稍有餘輒銖積寸累而祠未迄于成臨歿猶以爲恨焉君生平醇厚勇於爲善力所能及不以內外親疎爲辭如無錫諸生黃掌絲等館於家病則醫歿則殮且使其子各得生業又因侍親湯藥久通醫術常施丸散以施衆有來醫者皆予善藥察其貧乏少助之以資曰人心憂病安得減心寬則易起矣其仁心爲質如此初君體強壯少疾病及弟瑛歿哀痛過甚遂得類中病浸尋二十餘年日久滋甚以致於亡君幼聰慧覃研經籍作文光明俊偉應省試終於不遇君處之恬然及晚年抱病乃謂諸子曰我家六世科甲聯蟬不絕汝叔瑛雖以孝廉備員中書猶未足以繼祖宗之後子旣以病廢而汝曹碌碌誰有能承先澤者往往爲之泣下蓋君雖病而志猶在也歿于嘉慶五年六月二十日享年

六十有八初配蔣氏繼配陸氏生子四德豐德星德暄德薰
德星先歿女九皆適士族孫四驪騏驎駿孫女二人

論曰吳中科第之盛莫如繆韓彭三姓而繆爲最久君承其
世澤孝弟恭謹幾比漢之萬石君唐之河東柳氏宋之藍田
呂氏而名不著於賢書可慨也他日作史者必將表而出之
入于孝義其可置而不書乎余獲交于君垂二十年德豐又
從余游知其內行爲詳故仿震川家傳小傳之例掇其最者
著于篇庸以徵信于 國史云

節母黃孺人傳

孺人黃氏爲常州巨族祖承以進士官刑部員外郎父某以
博學宏詞徵世習禮法推于鄉黨乾隆三年戊午孺人年十
八歸編修蔣君麟昌時君父炳方爲少司農出巡撫湖南而

于歸之明年綱修君又成進士改庶吉士壬戌授編修功名
烜赫家世鼎盛而孺人以儉約自居簪珥服御皆屏其華麗
者事司農公暨繼姑楊太夫人色養備至以孝聞編修君預
修三禮悉心編纂得寒疾孺人每夜輒天願以身代比歿哀
痛不欲生潛取金環吞之幸婢姬覺救免而姑告之大義謂
當以撫孤爲亟乃飲泣強起辦搆家務井井如也撫孤子純
裕慈而教之嚴篝燈深夜讀弗稍貸也及司農公楊太夫人
先後歿哀毀中治喪一以書儀家禮爲準則先是甲午歲子
純裕登賢書壬子孫調復中順天鄉試衆方謂孺人當食節
孝之報逾年以舊疾發而終蓋孺人自編修君歿後哀苦過
甚得虛損之疾遇舅姑兩喪輒發至是卒以是疾終孺人之
卒年七十有四可謂中壽矣不知其疾仍節孝之所致也孺

人子一卽純裕孫三其一卽調次誠孫女一適同里徐日簪
今爲 知縣曾孫六映榮映柵映榮映榴映榮映楷皆蔚
然有頭角云

贊曰余少時爲中書舍人適司農公由湖南巡撫以事罷歸
還直軍機房故余獲與晨夕相見至余以按察使陝西而司
農次子騏昌適爲縣令恒道孺人之賢及壬子余主順天鄉
試調又出門下於孺人懿行知之爲詳三十九年地方大吏
以節孝請奉 旨建坊入祠烏頭綽楔照耀閭里其德行節
義蓋不待文而傳而余獲交於三代故從調之請据節略以
爲傳世有劉子政范蔚宗庶幾有取焉爾

節孝孔母唐孺人小傳

孺人唐氏江蘇崑山縣人句容孔君世求側室世求以服賈

居蘇州年四十無子其適張孺人爲委禽焉孺人知大義善承張孺人意雍容閨闈若姊妹然越二年生子象升甫二歲世求歿於句容孺人聞偕張孺人匍匐奔喪哀毀過節其年纔二十四也於是欲奪其志者孺人慨然以大節自許往往獨至河干井畔將致命幸值者援之得免張孺人泣謂曰吾門冀以不絕者惟此子耳居此恐終有變變則子更何恃吾家親黨皆在蘇州當與爾速往無遲也遂挈孤子行居山塘茅屋半椽操女紅以自食與張孺人相對怡然無怨色蓋數十年如一日也今象升成立抱兩孫將以孺人之節請旌於有司因俾予爲之傳云

論曰孔門禮義所自出故漢唐來賢達踵生莫可殫述而閩門女士以節烈著者尤衆余嘗攷曲阜志所載列女自孔氏

適人者凡七十有三自他姓女適孔氏者至一百二十七人而博士傳誌衍聖公貞幹之妾成得預坊表大書特書於志豈不偉歟非孔門禮義之教薰蒸漸漬有獨深者歟雖然厲卓越之行人也經險阻患難而能以自全天也孺人神明純固宜爾子孫得於天而食其報者洵未有艾矣烏頭綽楔之典亦將與博士聖公之家同炳於宇宙也

顧英小傳

英字若憲亦號蘭谷長洲人少慧父安愛之常被以男子服出揖親友吐辭驚長者年十三始珥環縮髻字青浦張之頊父遭疾英焚香誦經徹晝夜不倦疾革剗其臂糜湯以進逮母疾再剗之蓋篤孝如此顧氏本素封園林賓客以豪侈相尚英年十九歸張氏屏繁飾椎髻練精凡酒漿醢醢必躬飭

而後獻姑喜曰此真吾家婦也後數年舅德純罷常山令進帑數千金英傾嫁時貲以償之之瑁爲印江縣知縣舊事牽連禍不測英遣子鳳孫詣闕請代且爲營緩金事乃得釋然連年多故家益落或亭午爨烟閭然猶必脫簪典衣致一味之甘爲翁姑進膳雪夜凝洹與新婦女孫三世共擁一絮抱二火甕了不聞嗟嘆聲也子鳳孫舉博學鴻詞未第兩中副車授貴州貴定縣知縣人或惜之英曰人生通塞自有定命且受恩如負債亦非佳事也英喜讀書尤熟于史事工詩古文詞著有挹翠閣詩詞年六十二終貴陽官舍

節母蔣孺人小傳

孺人姓蔣氏我邑修竹鄉人也年二十二歸我友蘭圃高君高氏世以詩書爲職業本朝百六十年間相繼爲諸生者

六世孺人既歸親并曰慎蓋藏以家政爲己任俾蘭圃君不
紛志於學君姑邵孺人年老喪明呻吟牀蓐孺人則借二妣
扶持搔抑歷三載無倦色乾隆癸酉蘭圃君歿孺人煢煢飲
泣教其子寶廉惟恐先業之失墜又九年寶廉復以病瘵歿
孫培源甫三歲媳席孺人年僅二十有五孺人痛其子之蚤
世也又憐弱媳之喪所天也茹荼集蓼相與撫此呱呱者俾
至於成立嘗謂培源曰我家松門公自吳郡遷青邑至汝已
五世矣而宗祠未建我有志焉而未逮汝異日願成吾素志
又十年孺人卽世年五十有九

今上之十年培源謀於族人始克營宗祠於所居之南奉松
門公以下粟主以時孝享蓋以成孺人未竟之志也先是培
源欲以兩世苦節乞當事請旌於朝而孺人以年過三

十格於成例大吏僅以其母席孺人 入告於是培源痛大
母之幽光潛德未獲表見爰再予文以識之嗚呼孺人稱未
亡人者二十餘年而年僅下壽且又沮於年例未蒙綽楔之
褒則是孺人之節獨苦天所以報孺人之德者抑何獨嗇歟
雖然培源有餘濟才好讀古書當世賢士大夫無不愛而慕
之生丈夫子五人長成基年甫冠已有聲庠序餘皆斲然見
頭角是殆蒙莊所謂不報其人而報其人之天歟子與蘭圃
有僑扎之契培源又游予門素知孺人行事乃擇其最者表
彰之以俟邑乘之採云

女粹卿小傳

粹卿字慧仁年十七適嚴氏翁翰林院編修名福壻癸卯舉
人名榮生子一女二長女曰金次女曰某三子曰澗生也以

乾隆二十七年五月二十四日其卒也以四十八年十一月十五日年二十二粹卿少敏慧性情簡佚往往不屑不潔居京師久見婦女入權勢家植輿援輒指斥之常謂余兒弱息耳分不能揚清激濁安得作男子一雪此憤己亥十月余官副都御史又謂予曰昔唐貞觀之治不下文景而魏鄭公直言極諫無鯁避今大人官言職何時上疏論天下大事明年春予出爲江西按察使至今有愧其言也蓋粹卿六七歲先妣錢太夫人教之識字少長聞予讀書輒隅坐其側或取史書閱之故能知大義立志皎然如此先是四十四年余乞假葬先資政公粹卿始從先妣錢太夫人而南四十五年又從至江西余邁太夫人憂又從余歸里偕壻婦琴畫樓二年四十八年余召爲直隸按察使粹卿從至京師會祖姑之喪隨

舅遺珠街里產後遂病瘵以終嗚呼余年三十九歲前生數子皆不育太夫人以爲愛旣姬人陸氏生粹卿太夫人愛之不以爲女孫而視如孫甫七歲母歿太夫人尤愛憐之提攜襁抱推乾就濕不以爲孫而視如子比其嫁簪珥服御所需一一出太夫人手雖生子猶時時置著膝上今粹卿之病也醫不名和緩藥不具參苓女童老嫗不聞伺寢興於左右溼鬱掩抑奄忽以終嗚呼其先太夫人名之耶抑舍其婿與子女樂從先太夫人于冥漠耶訃及西安適在元夕之後余爲曾歆於邑繼以臥病閱五旬始愈追悼粹卿之歿并惟先太夫人愛憐之志有餘慟焉乃次其大概俾稍有聞於後云

春融堂集卷六十五終